

>

04 AUG 2004

Permaisuri-Mahasiswa

MAHASISWA PERLU HEBAT KUASAI ILMU DAN MANTAP SAHSIAH DIRI

PULAU PINANG, 4 Ogos (Bernama) -- Mahasiswa perlu hebat menguasai ilmu dan mantap dalam sahsiah diri dengan nilai tambah daripada segi kecekapan komunikasi dan penguasaan kemahiran yang diperlukan untuk kerjaya pada masa depan mereka.

Raja Permaisuri Agong Tuanku Fauziah Tengku Abdul Rashid bertitah mereka perlu melibatkan diri dalam aktiviti di luar bilik kuliah, membina jaringan dan hubungan profesional serta mengikuti proses pembelajaran yang terancang dan penuh minat.

"Menjadi mahasiswa pada zaman yang serba mencabar ini memerlukan fokus yang tidak berbelahbagi. Saudara dan saudari perlu melengkapkan diri untuk bersaing bagi menghadapi cabaran masa depan," titah baginda.

Baginda yang juga Canselor Universiti Sains Malaysia (USM) bertitah demikian ketika merasmikan Ekspo Konvokesyen dan Hari Terbuka USM sempena upacara konvokesyen USM ke-33 di sini hari ini.

Turut hadir ialah Naib Canselor USM Prof Datuk Dzulkifli Abdul Razak dan Timbalan Naib Canselor Hal Ehwah dan Pembangunan Pelajar universiti itu Prof Madya Datuk Jamaludin Mohaiadin.

Tuanku Fauziah juga menyeru mahasiswa supaya menjadi contoh ikutan serta memimpin masyarakat kelak dengan ilmu yang ada sambil mengimbangkannya dengan akhlak, sopan santun serta mempunyai ciri-ciri rakyat Malaysia yang cintakan negara.

Baginda bertitah mereka perlu bekerjasama dengan akrab tanpa mengira kaum, keturunan dan agama serta mengketepikan kepentingan diri bagi mewujudkan masyarakat Malaysia yang berilmu dan harmoni.

"Hasrat saya ialah untuk melihat saudara-saudari terus menjadi anak-anak muda contoh yang cemerlang dari segi ilmu, gemilang dari sudut peribadi dan akhlak serta mampu menzahirkan negara yang maju, berdaulat dan terbilang," titah baginda.

Terdahulu, baginda melancarkan pameran potret bekas Perdana Menteri Tun Dr Mahathir Mohamad yang mempamerkan lebih 50 potret termasuk yang dihasilkan oleh pelajar dan pensyarah USM.

Baginda turut melancarkan buku koleksi ucapan Dr Mahathir berkaitan sains dan teknologi yang bertajuk "Mahathir On Science and Technology". Buku setebal kira-kira 200 muka surat itu diterbitkan oleh USM.

-- BERNAMA

SA BK